

Kingusinnerpaamik UPA 2013-imi konto pingaarneq 30.10.45 Meeqqat inuusuttullu immikkut suliniuteqarfigineqarnerat pillugit suliniutit aallartisarneqarsimasut sumut killiffiinik naliliinertalinnik Naalakkersuisut Inatsisartunut nalunaarusioqqullugit peqquneqarnissaanik Inatsisartut aalajangiiffigisassaattut siunnersuut.
(Saqqummiisut: Inatsisartunut ilaasortat Ruth Heilmann aamma Kristian Jeremiassen, Siumut)

pillugu

Ilaqtariinnermut Peqqissutsimullu Ataatsimiititaliap

ISUMALIUTISSIISSUTAA

Aalajangiiffigisassatut siunnersuutip aappassaaneerineqarnerani saqqummiunneqartoq

Ilaqtariinnermut Peqqissutsimullu Ataatsimiititaliaq suliarinninnermini kingullermik ukuninnga inuttaqarpoq:

Inatsisartunut ilaasortaq Olga P. Berthelsen, Inuit Ataqatigiit, siulittaasoq
Inatsisartunut ilaasortaq Debora Kleist, Inuit Ataqatigiit, siulittaasup tullia
Inatsisartunut ilaasortaq Isak Hammond, Inuit Ataqatigiit
Inatsisartunut ilaasortaq Justus Hansen, Demokraatit
Inatsisartunut ilaasortaq Knud Kristiansen, Atassut
Inatsisartunut ilaasortaq Ruth Heilmann, Siumut
Inatsisartunut ilaasortaq Malik Berthelsen, Siumut

UKA 2012-imi ulloq 10. oktober 2012-imi siullermeerinerup kingorna ataatsimiititaliap siunnersuut erseqqinnerusumik suliassatut Ilaqtariinnermut Peqqissutsimullu ataatsimiititaliamut innersuunneqarpoq.

Siunnersuutip imarisaa siunertaalu

Siunnersuuteqartut siunnersuuteqarnerminni kissaatigaat UPA 2013-imut konto pingaarneq 30.10.45 *Meeqqat inuusuttullu immikkut suliniuteqarfigineqarnerat (ingerlatsinermut aningaasalissuutit)* pillugu suliniutit killiffiisa nalunaarusiorfigineqarnissaat nalilersorneqarnissaallu qulakkeerneqassasoq. Nalunaarusiami suliniutit siunertaq malillugu ingerlanersut aamma suliniutit naleqqussarnissaat allanngortiterneqarnissaalluunniit pisariaqarnerisooq erseqqissarneqassapput.

Siunnersuutip Inatsisartuni siullermeerneqarnera

Siullemeerinermi Naalackersuisut akissuteqataanni siunnersuummut allannguutissatut siunnersuut imaattoq saqqummiunneqarpoq.

Naalackersuisut kingusinnerpaamik UPA 2013-imut nalunaarusiussasut, tasanilu meeqqanut inuusuttunullu tunngasutigut 2010-miilli immikkut suliniutaasimasut tamarmik killiffissiorneqarlutillu naliliiffigineqarnissaannik Inatsisartut aalajangiiffisassaattut siunnersuut.

Naalackersuisut allannguutissatut siunnersuutaat Inuit Ataqatigiit tapersersorpaat. Siumup aallaqqaammut siunnersuut tapersersorpaat. Demokraatit Naalackersuisut allannguutissatut siunnersuutaat tapersersorpaat. Atassutip Siumup siunnersuutaat tapersersorpaat.

Misissuinerup annertussusaa siullermeerinerup nalaani isummersorfigineqarpoq. Tamatumani suliniutit suut nalilersorneqassanersut aamma piffissamut qanoq sivistigisumut utimut nalilersuisoqassanersoq pineqarpoq.

Tamanna tunuliaqutaralugu siunnersuut Ilaqutariinnermut Peqqissutsimullu ataatsimiititaliami suliareqqitassatut innersuussutigineqarpoq.

Ataatsimiititaliap siunnersuummik suliaqarnera

Kontomi pingaarnermi 30.10.45-mi aningaasaliissutit immikkoortinneqartut aamma kontomi pingaarnermi atuinerup allanngoriartornera ataatsimiititaliap misissorsimavaa.

	Aningaasaliissutit	Atuineq
Aningaasanut inatsit 2006	2.0 mio. kr.	1.5 mio. kr.
Aningaasanut inatsit 2007	7.3 mio. kr.	7.2 mio. kr.
Aningaasanut inatsit 2008	8.7 mio. kr.	8.9 mio. kr.
Aningaasanut inatsit 2009	15.4 mio. kr.	14.5 mio. kr.
Aningaasanut inatsit 2010	25.4 mio. kr.	19.3 mio. kr.
Aningaasanut inatsit 2011	24.5 mio. kr.	17.9 mio. kr.
Aningaasanut inatsit 2012	27.2 mio. kr.	

Meeqqat inuusuttullu sumiginnakkat pillugit paasititsiniaanermik aallarnisaanissamut Inatsisartut 2005-imi aalajangiinerat tunngavigalugu konto pingaarneq 2006-imi pilersinneqarpoq.

Meeqqanik sumiginnaanerup annikillissarnissaa siunertaralugu kommunit suliniutaannut immikkut ittunut konto pingaarnermut 2006-imi tapiissutaapput.

2007-imi aningaasat 500.000 kr.-it konto pingaarnermi 30.14.17 *Ikiuigasuarneq ikiuigasuarnissamullu upalungaarsimaneq* – mit kontomut pingaarnermut nuunneqarput, kiisalu kontomi pingaarnermi suliniutit annertunerusut ima allaaserineqarlutik:

- Telefonikkut ilaqutariinnik siunnersuisarnerup pilersinneqarnera
- Ilaqutariinnut immikkoortortanut tapiissutit
- Ikiuigasuarnissamut upalungaarsimaneq/tarnip pissusaanik ilisimasalimmit ikiorneqarneq
- Assersuutigalugu meeqqanik atornerluinerit annertunerusut pitillugit najukkami innuttaasunut ikiorsiineq
- Meeqqat ilaqutariillu atugaannik nalunaarsuineq
- Ilaqutariinnut højskolertitsisarnermut tapiissutit

Kontomi pingaarnermi naalackersuinikkut siunertat suliallu 2008-mi allaaserineqarnerisa 2007-imi allaaserisat assigaat.

Angajoqqaangortussanut pikkorissartitsinerit konto pingaarnermut 2009-mi ilanngunneqarput. 2009-mi konto pingaarnermut suli 3.3 mio. kr.-it ukiunut 2009-2011 ilaqutariinnut paarsisartunut pissutsit pitsangortinniarlugit ilassutigineqarput. Iliuusissatut pilersaarutitut, akuersissuteqarnermut aamma nakkutilliinermut aaqqissuussinertut 50/50-itut aningaasat taakku kommuninit qinnutigineqarsinnaapput.

Angajoqqaarsiaasartunut siunnersortitut kommunini aningaasartuutit angajoqqaarsianut tapiissutitut 50%-it akilernerqarsinnaanerit 2010-mi erseqqissarneqarpoq. Isummat allangortinniarlugit, innuttaasunut aamma meeqqanut inuusuttunullu immikkut nunap immikkoortuanut sammititamik suliniutinut kontomit pingaarnermi aamma aningaasaliisoqarpoq. 2010-mi konto pingaarnermi aamma pineqarput inunnut kinguaassiuutimikkut atornerlunneqarsimasunut suliniutit.

2010-mut aningaasanut inatsimmi meeqqanut tamanut meeraanerup pitsaasup toqqissisimanartullu nukittorsarnissaa siunertaralugu meeqqanut ilaqutariinnullu immikkut suliniuteqarnissamut aningaasat katillugit 25 mio. kr.-inik annertussusillit aningaasaliissutigineqarput. *Meeraaneq toqqissisimasoq* 2010-mi meeqqanut ilaqutariinnullu immikkut suliniutissat tamakku ingerlanneqarnerinut periusissaq allaaserineqarpoq. 2010-mut aningaasanut inatsisissamik suliaqarnermi konto pingaarnermut 30.10.45-mut 2010-mut aningaasaliissutinut sanilliullugu 10 mio. kr.-it suli aningaasaliissutigineqarput. Taamaalilluni 2010-mi aningaasaliissutit tamarmiusut siusinnerusukkut aningaasaliissutaareersunik annertuutigit tunngaveqarput.

2011-imi kontomi pingaarnermi naalakkersuinikkut siunertat imarisamikkut 2010-misulli ittuupput.

2012-imi konto pingaarnermi aningaasat 8.3 mio. kr.-it Meeqqanut inuusuttunullu periusissiamut atugassatut immikkoortinneqarput. Meeqqanut inuusuttunullu periusissiaq ilaatigut ilaqutariinnut højskolertitsisarnerup, ilaqutariinnut saaffiginnittarfiit aamma angajoqqaarsiat pillugit suliassaqrifiup, naapittarfiit il.il. kiisalu nunaqarfinni suliniutit immikkut ittu pillugit sulianik nangitsinerupput.

Inunnut kinguaassiuutitigut atornerlutaasimasunut suliniummut aningaasat katillugit 6.1 mio. kr.-it 2012-imi konto pingaarnermi tiguneqarput, konto pingaarneq 30.10.46 Kinguaassiuutitigut kanngutsaaffigineqarsimasunut immikkut ittumik suliaq-mut nuunneqarlutik.

AIS 2013-imi konto pingaarneq **30.10.45 Meeqqat inuusuttullu immikkut ittumik suliniuteqarfigineqarnerat**-nut katillugit aningaasat 11.1 mio. kr.-it immikkoortinneqassasut siunnersuutaavoq.

Ukiumi 2013-imi suliassaqrifimmi konto pingaarnermi 30.10.45-mi kisitsisit naatsorsuutigisat:

Aningaasartuutit 1.000 kr.-ngorlugit	N 2011	AI 2012	AIS 2013	M 2014	M 2015	M 2016
Ilaqutariinnut sullissivinnut ilaqutariinnullu højskolinut tapiissutit.	4.135	4.095	5.114	5.114	5.114	5.114
Ikiuiguarnissamut upalungaarsi- maneq/tarnip pissusiinik ilisimasalimmit ikiorneqarneq	5	427	436	436	436	436
Ilaqutariinnut højskolertitsisar- Nermut tapiissutit	2.921	915	0	0	0	0
Angajoqqaangortussanut pikkorissartitsineq	1.076	1.069	1.091	1.091	1.091	1.091
Angajoqqaarsiaasartunut suliniutit	2.122	3.529	2.602	2.602	2.602	2.602
Inunnut kinguaassiuutimikkut atornerlunneqarsimasunut suliniutit	2.830	0	0	0	0	0
Isummat allanngortinniarlugit sunniiniarneq	1.311	850	869	869	869	869
Nunap immikkoortuanut sammititamik suliniutinut immikkoortitat	2.413	0	0	0	0	0
Aningaasat agguagassat qimar-						

nguinnut, sumiginnaanerullu pinaveersaartinnissaanut suliniutinut:	1.096	0	0	0	0	0
Meeqqanut Inuusuttunullu Periusissiaq	0	16.307	0	0	0	0
Katillugit	17.909	27.192	10.112	10.112	10.112	10.112

2013-mut aningaasanut inatsisissatut siunnersuummi konto pingaarneq **30.10.46**

Kinguaassiuutitigut kanngutsaaffigineqarsimasunut immikkut ittumik suliaq-mut katillugit 6.2 mio. kr.-it immikkoortinneqarput.

Ukiumi 2013-imi suliassaqarfimmi konto pingaarnermi 30.10.46-mi kisitsisit
naatsorsuutigisat:

Aningaasaliissutit agguataarnerat	N2011	AI2012	AIS 2013	M2014	M2015	M2016
Nuna tamakkerlugu sullissivik	0	5.000	5.099	5.099	5.099	5.099
Pitsaaliuineq katsorsaanerlu	0	1.094	1.122	1.122	1.122	1.122
Katillugit	0*	6.094	6.221	6.221	6.221	6.221

*Konto pingaarneq 2012-imi pilersinneqarpoq, taamaattumillu 2011-imi naatsorsuutinut kisitsiseqarani.

AIS 2013-imi konto pingaarneq nutaaq **30.10.47 Meeqqanut inuusuttunullu periusissiaq** aningaasaliissutit katillugit 17.8 mio. kr.-it aningaasaliissutigineqassasut siunnersuutigineqarpoq. Aningaasat konto pingaarneq 30.10.47-miittut, konto pingaarneq 30.10.45-miit nuunneqarnissaat siunnersuutigineqarpoq.

Ukiumi 2013-imi suliassaqarfimmi konto pingaarnermi 30.10.47-mi kisitsisit
naatsorsuutigisat

Aningaasaliissutinik agguataarineq (t.kr.)	N2011	N2012	AIS 2013	M2014	M2015	M2016
Siusissukkut ukiut sammillugit suliniut	-	-	7.102	7.102	7.102	7.102
-/- ajomartorsiutinik qitiutitsilluni sulinuteqarneq	-	-	7.102	7.102	7.102	7.102
Atornerluisuunermik katsorsaaneq	-	-	889	889	889	889
Meeqqat ilinniarnert inerikkiartornerallu	-	-	888	888	888	888
Sulianik ilisimasalinnik ilinniartitsineq	-	-	888	888	888	888
Suliniutinik naliliineq, nakkutiginninneq uuttuinerlu	-	-	888	888	888	888
Katillugit	-	-	17.757	17.757	17.757	17.757

Ilaqutariinnik sullissiviit nalilersorneqarnerat 2011-imi saqqummiunneqarpoq. Meeqqat ilaqutariillu pillugit immikkut periusissap, suliniummi Meeraneq Toqqissisimasoq 2010-mi allaaserineqartup naammassineqarneranat atatillugu ukiakkut 2010-miit upernaakkut 2011-ip tungaanut nalilersuineq ingerlanneqarpoq.

Suliniutit immikkut ittut sumut killiffeqarnerannik misissortariaqartut nalilersortariaqartullu oqallisigineqarnerat ataatsimiititaliami ingerlanneqarsimavoq.

Tamatumani pineqarpoq konto pingaarneq 30.10.45 *Meeqqat inuusuttullu immikkut ittumik suliniuteqarfigineqarnerat*-ni suliniutit immikkut ittut taamaallaat nalilersorneqassanersut kiisalu piffissamut qanoq sivisutigisumut utimut nalilersuisoqassanersoq pineqarpoq. Ataatsimiititaliap tassunga tunngatillugu isumaqatigiittoqannginnera oqaatigaa. Amerlanerussutillit tassaasut Inuit Ataqtigiit aamma Demokraatit isumaat tassaavoq nalilersuineq suliniutinik 2010-meersunik aallaaveqarsinnaasoq kiisalu meeqqat inuusuttullu pillugit suliassaqarfimmi suliniutit aallartinneqarsimasut tamarmik ilanngunneqarsinnaasut.

Aammattaaq ilaqutariinnik sullissiviit 2010/2011 nalilersuiffigineqarnerannit annertunerusumik nalilersuiffigineqarnissaat pisariaqartinneqarnersoq ataatsimiititaliap oqallisigisimavaa. Tassunga tunngatillugu kommunini ilaqutariinnik sullissivinni kiisalu ineriartortitsinissamut suliniutaaratarsinnaasuni aningaasanik tapiiffigineqartuni ineriartornerup ataavartumik siumullu isigisumik nalilersuivigineqarnissaata pingaaruteqarnera ataatsimiititaliap oqaatigaa. Ataatsimiititaliap killiffiit nalilersuinerillu pillugit nassuiaatissanik ataavartumik ilisimatinneqartarnissaa ataatsimiititaliap kaammattuutigaa.

Taamaattorli meeqqanut inuusuttunullu ulloq unnuarlu paaqqinnittarfinni inissinneqarsimasunut tunngatillugu suliniutit pillugit annertuumik misissuisoqarnissaata nalilersuisoqarnissaatalu pisariaqartinneqartutut isigineqarnera ataatsimiititaliap tamarmiusup isumaqatigaa. Ulloq unnuarlu paaqqinnittarfinni meeqqat inuusuttullu siornatigut inissinneqarsimasut pillugit ilisimasanik amigaateqarpugut. Inuunermik ingerlaqqinneranni qanoq atugaqarpat, kiisalu isumassuinermut tapersersuinernullu tunngatillugu, inissinneqartumut kiisalu inuiaqatigiinnut pitsaasumik angusaqarfiusimanersoq. Suliniutitta ataavartumik naliliivigineqartarnissaat kingumullu nalilersorneqartarnissaat naalakkersuinermik suliatigut pingaaruteqarpoq, taamaalilluta aaqqiissutit suliniutillu naleqquttut toqqarnerlugit imaluunniit nalimassaasoqarnissaanik pisariaqartitsisoqarnersoq ilisimasaqarfigilerniassagatsigu.

Siunnersuutip aningaasaqarnikkut sunniutissai

Inatsisartunut ilaasortat Ruth Heilmannip aamma Kristian Jeremiassenip siunnersuumminni siunnersuutip aningaasaqarnikkut sunniutissaat missilioraat ataatsimiititaliap maluginiarpaa, taamaalillutik allaffissornermut aningaasartuutit, nutserinermut aningaasartuutit ilanngullugit ukiup affaanut naapertuuttumik ilinniagartuutut atorfimmu 250.000 kr.-it aningaasartuutigineqassallutik. Aningaasartuutit allaffissornermi ataatsimut sinaakkutaasut iluanni pingaarnersiorneqassapput.

Naalakkersuisut allannguutissatut siunnersuutaannik piviusunngortitsinermi aningaasaqarnikkut sunniutissaanut missiliuutit, aallaqaammut siunnersuutip qaffaseqataanik inissisimassasut missiliorneqarput.

Ataatsimiititaliap inassutai

Ataatsimiititaliami amerlanerussutillit tassaasut Inuit Ataqtigiit aamma Demokraatit, siunnersuut pillugu ima oqaaseqassapput:

Siunnersuummik suliniuteqarneq amerlanerussutilinnit tunngaviumik assut nuannaarutigineqarpoq. Aallarnisaanitta suliniutittalu ataavartumik naliliivigineqartarnissaat pingaaruteqarpoq.

Taamaattorli Naalakkersuisut allannguutissatut siunnersuutaat amerlanerussuteqartunit assut iluarisimaarneqarpoq, tassami kontop pingaarnerup 30.10.45-ip allaaserineqarnera nalilersuiffigineqarneralu, taassumalu ataani suliniutit kisimik pineqanngimmata. Kingusinnerpaamik UPA 2013-imi Inatsisartunut nalunaarummik saqqummiussisoqarnissaa, tassanilu immikkut ittumik suliniut 2010-meersoq aallaavigalugu meeqqat inuusuttullu pillugit suliassaqaarfimmi suliniutit tamarmik Naalakkersuisunit killiffilersorneqarnissaat naliliivigineqarnissaallu amerlanerussutilinnit naleqquttutut isigineqarpoq. Suliniutit 2010-miit ingerlasut arlallit 2006-imi kontop pingaarnerup 30.10.45-ip pilersinneqarneranik aallaveqarnerat ataatsimiititaliap aamma akuersaarpaa. Amerlanerussuteqartulli tamatuma peqatigisaanik, kontomi pingaarnermi 30.10.45-mi aningaasaliissutit 2010-mi malunnaatilimmik qaffariaateqarsimanerat oqaatigaat. AIS 2013-imi aningaasat 16.646.000-it konto pingaarneq 30.10.45-mit konto pingaarneq 30.10.47 *Meeqqanut inuusuttunullu periusissiaq*-mut nuunneqarnissaasa siunnersuutigineqarnera erseqqissaatigineqassaaq.

Ataatsimiititaliami amerlanerussutillit qulaani taaneqartut tamanna tunuliaqutaralugu Naalakkersuisut allannguutissatut siunnersuutaat Inatsisartunit akuersissutigineqassasoq inassutigaat.

Ataatsimiititaliami amerlanerussutillit siunnersuutip siulliup itigartitsissutigineqarnissaa inassutigaat.

Ataatsimiititaliami ikinnerussutillit tassaasut Siumut aamma Atassut siunnersuut pillugu ima oqaaseqassapput:

Isumaginninnerup aammalu pitsaaliuinerup tungaatigut pingaartumillu Meeqqanut inuusuttunullu ataatsimoortumik akisussaaffeqarnerup nukittorsarnissaanut tamatta kivitseqataasussaavugut, pissusissamisoortipparpullu suliniutit assigiinngitsut aallartisarneqareersimasut


killiffii nalilersornerilu pillugit nalunaarummik tigusaqarnissarput. Siumumit Atassumiillu akuersaanngilar-put Naalakkersuisut 2010 -miit taamaallaat aallartittumik naliliinerup pinissaanik allannguutissa-mik siunnersuutaat. Ilami ukiut marluinnaat aallaavigalugit kingumut naliliisoqassagaluarpat takussutissaalatsiso-qassammat, pitsaanerussasutullu isumaqarfigaarput kontop taassumap pilersinneqarneraniit tassalu 2006-mit kingumut qiviarluni nalilersuinissap pinissaa pissappat.

Ukiuni taakkunani aningaasaliisarnerit aallartinneqarneraniit suut suliniutigineqarsimappat? Kommunitut aningaasaliissutaasut qanoq ingerlanneqarsimappat? Namminersornerusut Kommunitullu akornanni aningaasaleeqatigiittarnerit qanoq ingerlanneqarsimappat? Illoqarfinni aammalu nunaqarfinni akimortumik suleqatigiinnissamik kaammattuutit najoqqutaralugit sule-qatigiittoqartarpa? Taamaattoqanngikkaangat suut aporfiusarpat? Aningaasaliissutit Meeqqanut sumiginnakkanik taaneqartartunut iluaqutissanngorlugit toqqaannartumik taakkununga tutsin-neqartarsimappat? Ilaqutariit meerartallit ataatsimoortillugit angajoqqaanulluunniit immikkut siunnersuinermut pikkorissaanernullu aningaasaliissutit atorineqartut siunertaanut naapertuut-tumik angusaqarfiusarsimappat? Tassalu ilaqutariit pitsaasumik atugaqalernerannik kinguneqar-tarsimanagerat qanoq malitseqartinneqartarpat? Siumumit Atassumiillu Meeqqat Inuusuttuaqqallu ukiuni taakkunani suliniarfineqarnerat qanoq isikkulimmik ingerlanneqartarnerat paasisimasaqarfigilluassallugu pingaaruteqartorujussuutut isigarput pisariaqartuutillugulu. Taamaattumik siunnersuummut uunga tunngatillugu suliniutaa-sunut Ilisimasalik katersuiffimmik pilersitsisoqarnissaa matumuuna pilersinneqassasoq Siumumit Atassumiillu kissaatigaarput Naalakkersuisut ilanngullugu sulissutigissagaat.

Ataatsimiititaliami ikinnerussutillit qulaani taaneqartut tamanna tunuliaqutaralugu siunnersuutip siulliup Inatsisartunit akuersissutigineqarnissaa inassutigaat.

Ataatsimiititaliami ikinnerussutillit Naalakkersuisut allannguutissatut siunnersuutaata tamatuma malitsigisaanik itigartitsissutigineqarnissaa inassutigaat.

Ataatsimiititaliap taamatut oqaaseqaateqarluni isumaliutissiisummilu allassimasutut paasinnilluni siunnersuut aappasaaniigassanngortippaa.



Olga P. Berthelsen,
Siulittaasoq



Debora Kleist



Isak Hammond




~~Justus Hansen~~ Arnid P. Rex



~~For-~~ Knud Kristiansen



Ruth Heilmann



Malik Berthelsen